


ル 5  
326  
19



門儿呂5  
新326  
卷19



名山巖洞泉石古蹟卷之十四

吳興歸安山泉慎蒙編選

校正 錢梓

四川

成都府

武檐山 在府治北蜀記武都山精化為女子蜀王  
開明納為妃不習水土而死王遣五丁於武都山檐  
土為塚蓋地數畝高七丈上有石厚五寸徑五丈瑩  
紫號曰石鏡用表其門又傳成都內及毘橋側有一  
折石長三丈云是五丁檐土檐也漢昭烈即位於武

名山記  
卷之十四  
一  
檐之南謂此

鐵爐山 在府城南六十里五代之季日者占此山當出異人乃掘羅氏之墓有松根纏棺狀若雙龍取刀斷之流血不止

聖燈山 在雙流縣東南四十里一名普賢山世傳昔有普賢聖燈出現蜀太后看聖燈○所恨風光看未足却驅金翠入龜城

麗元山 在新都縣北八里平地特起高三丈有雙石鏡廣五尺

玉女山 在簡縣東北二十里仙人李八百脩煉於

此山東北有泉西北兩岸各有懸崖腹有石乳房十七眼土人呼為玉華池

逍遙山 在簡縣西三十里宋景德間有楊用晦者隱居此山山北有層崖崖有東西二室西室後有二丹竈又有石窟壁上有漢安元年四月十八日會仙友字

雙牙山 在簡縣東五十里山頂有古井山半有石箱昔有兩金鷲晝浴於井夜棲於箱人欲捕之遂飛上南山化為雙石對峙若齒牙然

玉京山 在資縣西南五十里峭嶮壁立挿天連雲

儼然在目。上有觀曰太霄。

鐸影山 在內江縣西二十九里有二泉竇更流迭止與晦朔之盈縮相應。

高臺山 在灌縣西南七十里上有晉時所立上清宮夜間有燈火飛行或謂草木之精所為云。

青城山 在灌縣西南五十里唐杜光庭記岷山連峯接岫千里不絕青城乃第一峰也前號青城峰後名大面山山有七十二小洞應七十二候有八大洞應八節道書以此山為第五洞天乃神仙都會之府九隴山 在彭縣北四十餘里一伏隴二豆隴三秋

隴四龍奔隴五走馬隴六駱駝隴七千秋隴八較車隴九橫擔隴是也。

庚除山 在綿竹縣東四十里上有石洞三宋初有霽雲子者入洞中見樓臺金碧守門者呵止之曰子凡骨可亟去不然及禍其人回後再尋石洞遂迷故道。

五塊石 在府城南石有五塊高一丈餘相傳下有海眼昔人嘗起其石風雨暴作。

房湖 在漢州治南唐房瑄為刺史日所鑿凡數百畝洲島回環亭堂臺榭甚多同時高適杜甫皆嘗賦

名山記 卷之四 三十一  
味宋蘇轍詩○酒壓郫筒憶舊沽花傳五老出新圖  
此行真勝成都尹直為房公百里湖

廉水 在彰明縣治北平地泉出宋明帝因言及貪  
泉問梓潼人范栢年曰卿鄉土有此泉否栢年對曰  
梁益間惟有廉泉讓水不聞有貪泉帝善之即拜梁  
州刺史又今漢中府亦有此二水

浣花溪 在府城西南五里一名百花潭按吳中復  
冀國夫人任氏碑記夫人微時見一僧墜汚渠為濯  
其衣百花滿潭因名其潭曰浣花唐妓薛濤家潭旁  
以潭水造紙為十色箋李義山○浣花箋紙桃花色

即此又宋韓浦與弟洎皆有辭藻洎嘗曰予之為文  
是造五鳳樓手浦得箋為詩以惠洎○十樣蠻箋出  
溢州寄來新自浣溪頭老兄得此渾無用助爾添脩  
五鳳樓

躍龍池 在府城東南二十里隋開皇中欲伐陳鑿  
大池以教水戰郡志曰蜀王秀取土築城因為池有  
胡僧見之曰摩訶宮毘羅蓋謂摩訶為大宮毘羅為  
龍謂此池廣大有龍也

古蹟

廣莫亭 在灌縣舊朝天門宋呂大防記危簷飛檻

名山記 卷之十四 四  
負城四出觀覽之勝甲於東南出金馬門過朝天寺  
登廣莫亭憑欄下視一目千里

萬里橋 在府城中門外寰宇記著諸葛亮送費  
禕聘吳至此曰萬里之行始於此矣又唐史載玄宗  
狩蜀過此問橋名左右對以萬里玄宗嘆曰開元末  
僧一行謂更二十年國有難朕當遠游至萬里之外  
此是也遂駐蹕成都

折柳橋 在簡縣朝天門外初名情盡唐刺史雍陶  
易今名詩○從來只說情難盡何事教名情盡橋自  
此改名為折柳任教離恨一條條

清都觀 在灌縣西南六十里宋文彥博鎮蜀與張  
俞定交市觀側地以贈俞號白雲隱居

芙蓉城 蜀孟昶僭擬宮苑城上盡種芙蓉謂左右  
曰真錦城也

花藥夫人宅 在灌縣宋陳後山詩話費氏青城人  
五代時以才色入蜀宮後主嬖之效王建作宮詞百  
首國亡入宋備後宮太祖召使陳詩即誦云○君王  
城上豎降旗妾處深宮那得知四十萬人齊解甲並  
無一箇是男兒

石笋 在府城西門外寰宇記蜀之五丁每一王死

輒爲立大石長三丈重千鈞以爲墓誌今石笋是也  
又云一南一北北笋長一丈六尺圍極於九尺五寸  
南笋長一丈三尺圍極於一丈二尺蓋南笋公孫述  
時折故長不逮北笋○杜光庭石笋記云舊傳石笋  
之名有六曰石笋曰蜀妃闕曰沉犀石曰魚鳧仙壇  
曰西海之眼曰五丁石門○成都記云距石笋二三  
尺每夏月大雨往往陷作土穴泓水湛然凡三五日  
忽然不見故有海眼之說唐杜甫詩○君不見城西  
門陌上石笋雙高蹲古來相傳是海眼蒼蘚蝕盡波  
濤痕雨多往往得琴瑟此事恍惚難明論恐是昔時

卿相墓立石爲表今仍存

八陣圖 在新都縣北三十里牟彌鎮諸葛亮八陣  
圖凡三在夔州者六十有四方陣法也在牟彌者一  
百二十有八當頭陣法也其在碁盤市者二百五十  
有六下營法也

鐵龜 在灌縣江都堰元四川廉訪僉事吉當普鑄  
萬斤大龜以鎮江濤之險

保寧府

天目山 在府城東一百五十里相傳葛洪脩煉之  
所山有二洞一曰天目一曰天溪唐杜光庭詩○盤

空躡翠到山巔竹殿雲樓勢通天古洞草深微有路  
舊碑文滅不知年一州物像分簷外萬里煙霞在目  
前自是人間輕舉地何須蓬島訪真仙

離堆山 在南部縣東南五十里蜀有三離堆此其一也唐顏真卿磨崖記見後

思依山 在南部縣西北一百四十里中有東西二  
觀有峻仙洞搗藥臺浴丹井煉丹爐西觀有平仙洞  
搗藥曰卓劍穴圍棋局相傳漢羅冲霄張道陵依此  
山修道故名

雲臺山 在蒼溪縣東南三十五里高四百丈山峯

峻削插天一名天柱即漢張道陵昇仙處宋建永寧  
觀有洞曰麻姑芙蓉平仙峻仙池曰浴丹玉魚巖曰  
松根蟠桃又有九轉亭丹竈尚存山多榕栢有一絕  
一者中空可坐數人旁有亭名魁栢

五婦山 在梓潼縣北一十二里相傳秦惠王遺蜀  
王夫女五人蜀王遣五丁力士迎之至此五丁蹋地  
大呼五女並化為石故名

漫天嶺 在廣元縣東北三十五里山極高聳有大  
漫天小漫天唐羅隱○西去休言蜀道難此中危峻  
已多端到頭未會蒼蒼色爭得禁他兩度漫



壘城巖 在府城東六十里比他巖最深邃巖上有  
 滴乳為水珠石上有雙竹痕長尺許仰觀枝節儼然  
 停雲巖 在南部縣北二里宋李燾詩○路轉層岡  
 二里餘武陵傳者亦難如昔年煉藥仙人室今日餐  
 霞道士居洞外蟠桃開錦綉巖前丹溜漱瓊瑤猗歎  
 靈氣為時雨可惜圖經闕不書

龍巖 在劍州北七十里洞穴可坐百人蜿蜒如龍  
 盤之狀州治西亦有龍巖可坐百人

靈雲洞 在南部縣東北外邃中廣冬暖夏涼入三  
 丈許踏之有聲如鍾叩之亦然

劍泉 在梓潼縣北一十里相傳昔蜀五丁力士遺  
 劍隱於路隅化為此泉有碑杜若晦○五丁彈鋏氣  
 如虹斫破蒼崖萬仞峰寶匣信難留異物寒泉終見  
 表遺踪

浴丹池 在劍州普安廢縣唐杜光庭浴丹之所池  
 中有魚赤鬣色如金飛躍其中人或採取必觸風雷  
 之變

古蹟

劍閣 在劍州北三十里兩岸峻拔鑿石架閣而為  
 棧道連山絕險故謂之劍閣秦司馬錯由此道伐蜀

龍門閣 在嘉陵江東岸佛崖視他閣最為險固杜  
甫○清江下龍門絕壁無尺土

籌筆驛 在廣元縣北八十里蜀漢諸葛亮出師嘗  
駐于此唐李義山詩○魚鳥猶疑畏簡書風雲長為  
護儲胥徒令上將揮神筆終見降王走傳車之句

玉女房 在蟠龍山南晏殊類要有一石長四十丈  
高五尺當中有戶及門扇若人之掩閉然

治平園 在府治北宋太守朱壽昌築內有即官庵  
三角四照紅藥之亭清風明月之臺錦屏閣花塢柳  
橋曲池凡十所文同嘗賦十詠石刻猶存

千年木 在劍州西八十五里古延福寺內嘗有古  
木一株甚巨二白羊往來其下近之則不見

順慶府

金泉山 在府城西唐仙女謝自然於此白日飛昇  
上有石像宋李宏詩○昔時謝女昇天處此日遺蹤  
尚宛然蟬蛻舊衣留石室龍飛靈水湧金泉碑書故  
事封蒼蘚殿寫真容鎖翠烟薄暮松顛聽鶴唳猶疑  
彷彿是神仙

清居山 在府城南三十五里上有白雲光相汲江  
五友四亭唐姚昂○天設兩峰南北峭地盤一水占

今流

子仙山 在廣安州西二十五即秀屏山來岡相傳漢馮緄之子馮真人修煉於岳門山一日辭父母謂當仙去矣來晨白鶴飛翔為候緄登此山望之已而果然故又名望子山

羊山 在岳池縣北三十里峰巒秀異山下有洞曰角竹樵牧每見羊自洞出叱之復回世傳梁天監中有居士於此棲隱講誦二羊跪聽因名

七碑石 在大竹縣西南一百里有七巨石望之宛然如碑

畫卦石 在南充縣東四十里其石平如砥上畫八卦文相傳周柱下史李耳於此以足畫之足跡尚存篆水 在廣安州東北五里江中灘石縱橫湍流奔急呼為三十六灘其間有兩渠相距二尺廣深半之可以流觴每歲冬春之交水落石出官吏士庶多來賞於此

滴乳泉 在府城西二十里昔有道士何志全飲此泉年八十面如桃紅宋樊汝賢詩○雲液落山腹脉與崑崙通云何山中叟八十桃顏紅

金泉 在金泉山下相傳唐李淳風於此藏金化為

泉宋江萬里書金泉二字於崖上

古蹟

石繖 在廣安州東五里江之中流有巨石圓圍二丈餘中高四垂狀若繖蓋因名俗呼爲石涼繖

石船 在大竹縣西南一百里溪中有巨石長三丈許宛如石船

山燈 蓬州有山燈現凡五處初不過三四點漸至數十點高下相應離合不常在蓬山者尤爲靈異土人呼爲聖燈

叙州府

石門山 在慶符縣治南下瞰石門江其林薄間多蘭有春蘭秋蘭鳳尾蘭素蘭石蘭竹蘭春蘭花生葉下素蘭花生葉上黃庭堅幽芳亭記一幹兩三花而香有餘者蘭一幹十數花而香不足者蕙一名蘭山凌雲山 在富順縣治西大江前橫一峰突兀邦人以此爲登眺之地

瑪瑙山 一曰北巖上有羅漢洞內有石佛五百洞前有水簾廳

聖燈山 山之西有石峰峭拔高數丈如佛像俗呼爲聖佛傍有二石如侍者蓋天成也

平蓋山 在南溪縣西一十五里有三山九隴惟此  
山一峯特出頂圓而平故名一名牛心山一名瑪瑙  
山漢真人劉景鶴隱此煉丹有石洞深邃上有石穴  
圓如蓋有水出焉往時游人憇此掬水飲之取之不  
竭又有木葉紋如篆謂之符葉

桂輪山 在南溪縣西七十里石壁上有黃庭堅所  
書大桂輪山四字

樾子洞 在長寧縣北三十里內乳結遍洞如樾故  
名又有朝真洞在絕頂棲真洞在山谷之物寧真洞  
尤亢爽有樓閣堂奧之象

涇灘瀑布 在長寧縣東七十里自山頂飛流而下  
數十丈其下有潭怖心駭目俗呼爲一匹絹

涪井 在長寧縣治北泉有二脉一醜一淡取以煎  
鹽塞其一則皆不流又謂之雌雄井

古蹟

鎖江亭 在鎖江側宋黃庭堅○鎖江亭上一尊酒  
山自白雲江自橫陸游○千尋鐵鎖還堪恨空鎖長  
江不鎖愁

味諫軒 在府治北宋岳珂程史云戎州有蔡次律  
者家于近郭黃庭堅嘗過之延飲小軒檻外植餘甘

子數株因乞名題曰味諫軒後王子予以橄欖遺之  
庭堅詩云○方懷味諫堂中果忽見金盤橄欖來想  
其餘甘有瓜葛苦中真味晚方回

重慶府

塗山 在府城東八里岷江南岸山之址有石中分  
名曰龍門其下水與江通左右石壁有鯉魚飛躍之  
狀山之麓舊有夏禹祠塗后祠故址然塗山之名太  
平濠州皆有蓋因其土俗相傳云

濠山 在府城南一百二十里崖壁峭拔有四十八  
面四時青翠有類蓬瀛唐貞觀中置瀛山縣以此宋

劉望之○山盤四十八面險雲暗三百六旬秋

純陽山 在合州北三里相傳唐女冠范志立得道  
處天寶間任安為使至此慕之約期而會及往志立  
變為男子宋劉儀鳳詩○誰家游冶郎門首闕幽闥  
但見臉如花不知心似鐵一夕變其軀雪質映雲髮  
昔為桃李枝今作松栢節

青石山 在合州西二百四十里昔巴蜀爭界久而  
不決漢高帝八年一朝密霧石為之裂自上及下破  
處真若引繩於是州界始判

平都山 在酆都縣東北三里道書七十二福地之

一也前漢王方平得道於此後漢陰長生亦於此昇  
仙有煉丹古蹟及仙都觀觀有唐碑十段

洪崖洞 在府城西三里一名滴水巖中有巨石懸  
其下嵌空上有瀑布瀉出巖前上刻蘇軾贈任仲儀  
詩與黃庭堅留題

棲真洞 在府城西人菲峽內宋丁謂題詩于石壁  
白鹿洞 在忠州治東相傳昔有二獵人逐白鹿入  
洞失鹿所在但見二碧瓜食之得仙

櫃崖 在南川縣東南一百里峭崖壁立上有洞洞  
門中有一櫃往歲時聞斧斤聲有飛屑隨水下疑洞  
中有神物也

魚鹿峽 在府城西北一百二十里涪海水自中流  
出一石狀若魚一石狀若鹿故名

明月峽 在巴縣境梁李膺益州記石壁高四十丈  
壁有圓孔形如明月因名華陽國志廣德嶼者是也  
溫湯峽 在府城西南一百六十里上有溫泉自懸  
崖下湧出四時騰沸如湯

四十八渡水 在南川縣東三十里兩山壁立一水  
灣環其中凡四十八渡其門穴如戶牖野花葱蒨行  
平徑數百步湧一石臺水出其中有石龍二

鳴玉溪 在忠州西北一十五里有懸崖瀑布高五十餘丈潭洞幽邃古木蒼然

七門灘 在江津縣西七十里有大石橫江凡七處望之如門

古蹟

張飛祠 在長壽縣治西又涪州亦有廟宋大觀間於廟前得三印及佩鈎刀斗上鐫飛名張士瓌詩○天下英雄執豫州阿瞞不共戴天雙山河割據三分國宇宙威名丈八矛江上祠堂嚴劔佩人間刀斗見銀鈎空餘諸葛秦川表左袒何人復為劉

金注子 在江津縣北五里昔有僧憇於此有鳥啣僧衣袖牽而上見注子隱石縫中手不能及折石畔苦檀枝挑出之遺跡尚存

金釵影 在江津縣西一百五十里周溪上石磧中有淺水一斷周迴五六尺隱隱見雙金釵影

海棠香國 在大足縣海棠無香此地產者獨有香舊郡治前有香露亭花亭俱廢

江心石魚 在涪州鑑河上流江心有石刻雙魚皆三十六鱗一啣萱草一啣蓮花有石秤石斗在傍魚現則年豐



石鏡 在合州涪江有石立水心正圓如月水落時出高可三丈俗謂石鏡

夔州府

石柱山 在大寧縣北二十里一峯削成如巫峽所望剪刀峰與道士峰相連皆奇觀也

西山 在萬縣西三里上有絕塵龕宋郡守馬元穎曾有開元翰脩西山池亭種蓮栽荔枝雜果凡三百本景物清絕為夔路第一

蟠龍山 在梁山縣東三十里孤峙秀傑突出衆山下有二洞洞有二石狀如龍首尾相蟠

金鳳山 在梁山縣西五十里山之南半崖有罅邃然內皆洞明其石上有若圖仙女狀面貌儼然時若搖動迫而視之則不見

瞿唐峽 在府城東舊名西陵峽乃三峽之門兩崖對峙中貫一江灑瀨堆當其口唐杜甫詩○三峽傳何處雙崖對此門仰天猶石色穿水入雲根白居易詩○瞿唐天下險欲上信難哉岸似雙屏合天如匹練開

巫峽 在巫山縣東三十里即巫山也與西陵峽歸峽並稱三峽連山七百里畧無斷處自非亭午夜分

名山言  
不見日月水經云杜宇所鑿以通江水圖經云此山  
當抗峯岷峨借嶺衡嶽疑結翼附並出青雲

書院峽 在梁山縣東五十里峽石市之北每風雨  
冥冥如聞讀書聲故其中有夫子崖子貢垠

岑公巖 在萬縣大江之南盤結狀如華蓋左為方  
池有泉湧出巖簷遇盛夏注水如簾昔岑公修道於  
此俄而仙去唐刺史馬冉○南溪有仙洞咫尺非人  
間

寶芝洞 在鳳凰山頂有泉水自洞出衝沙漱石散  
而為乳與上相雜積成山峯嵌空竒崛自然天巧山

民斲掘得之以植菖蒲

灩澦堆 在瞿唐峽口江心突兀而出水經云白帝

城西有孤石冬出水二十餘丈夏即沒秋時方出諺

云灩澦大如象瞿唐不可上灩澦大如馬瞿唐不可

下峽人以此為水候唐白居易詩○見說瞿唐峽橫

斜灩澦根難於尋鳥道險過上龍門

噴霧崖 在蟠龍山崖高數十丈飛瀑傾注噴薄如

霧宋張商英嘗游此題云水味甘腴偏宜煮茗非陸

羽莫能辨之范成大亦以為天下瀑布第一

丙穴 在達縣東北明通廢縣井峽中凡十穴皆產

嘉魚春社前魚即出穴秋社即歸其出也止於巴渠  
龍脊灘首有黑點謂照映星象相感而成長身細鱗  
肉白如玉其味白鹹蓋食鹽泉也唐杜甫○魚知丙  
穴由來美

雌雄泉 在多喜山上有雌雄二泉名浴丹井春夏  
則左盈右竭秋冬則右盈左竭

天池 在府治巫山縣亦有唐杜甫詩○天池馬不  
到嵐壁鳥纔通百頃青雲杪層波白石中

古蹟

栢杜 在白帝城西大十圍高三丈世傳為公孫述

時樓柱斫之出血枯而不朽

燕子坡 在巫山縣與烏飛巖相對宋王十朋○坡  
名燕子燕思歸巖號烏飛烏倦飛

潼川州

鷺溪 在鹽亭縣西北八十里其地產絹宋文同○  
待將一片鷺溪絹掃取寒稍萬丈長蘇軾○為愛鷺  
溪白繭光

火井 在伏龍山下地窪若池以火引之有聲隱隱  
出地中少頃炎熾夏月積雨停水則焰生水下水為  
之沸而寒如故冬月水涸則土上有焰觀者至焚衣

裾

古蹟

孝義臺 在鹽亭縣東一百三十里宋時邑人馮伯瑜剖腹取肝愈父疾縣令下詔為築臺於此立石旌表之又蓬溪縣西亦有孝義臺蜀孟昶時里人程崇事親孝方冬母病思筭號泣林中為生數筭縣令陳元佐○戢戢蒼芽為母生淚痕落處兩三莖

眉州

墓頤山 在州城東七里自象耳山連峯壁立西瞰玻瓈江五十餘里至此磅礴蹲踞形類墓頤故名上

有淘丹泉山腹有穴曰龍洞唐末有楊太虛爾朱先生得道于此輿地紀勝人日出東郊渡玻瓈游墓頤眉之故事也

峨眉山 在州城南二百里宋白○不知立處高多少只見星辰在下頭詳見記

龍鵠山 在丹稜縣北十五里上有龍鵠觀乃成無為楊正見李鍊師三仙成道處宋李燾少時讀書山中築室曰巽巖子壁皇亦讀書于此孝宗御書龍鵠山三大字石刻尚存壁有詩○抽得閑身伴瘦筇亂敲青碧喚蛟龍道人掃徑收松子缺月初懸天柱峰

上巖 在青神縣東北五里上有垂拱寺相傳巖下嘗有龍聽僧講經宋范鎮詩○巖雨晴猶滑溪泉直復迂傾崖目眩轉亂石步崎嶇

中巖 去上巖五里許即諾距羅尊者道場上有喚魚潭客至撫掌魚輒群出又有羅漢洞即牛頭僧以木鑰扣石筍處

九龍洞 在丹稜縣柵頭村洞中有石榻石竈之類上有峰巒如太湖靈壁之狀

玻璃江 在慕順山下即岷江也源出岷山瑩若玻璃因名一名慕順津即唐田令孜沉孟昭圖處

### 古蹟

遠景樓 在州治北北堂上宋郡守黎錞建蘇軾記大雅堂 在州城南五十五里宋丹稜楊素建黃庭堅謫戎州嘗曰安得奇士盡刻杜甫兩川及夔州詩使大雅之音復盈三巴之耳哉素聞之訪庭堅於戎請攻堅珉刻詩作堂翼之庭堅乃悉書甫詩遺之因名堂曰大雅因為之記

石筍 在中巖山半三石突起其形類筍傍有諾詎那尊者古道場宋元徽初有異僧入牛頭寺主僧厚禮之別去贈以一鑰曰後欲見我當至中巖山見石

筭扣之可以見我明年寺以低頭佛失珠主僧馳至石筭峯下扣以鑰峯裂為三乃見異僧曰盜取佛珠江濱我得之矣主僧喜持珠而還

石倉 在彭山縣東北二十五里半山石壁間有崖竇如蜂房相傳竇中嘗出米崖上刻石倉米洞四字

嘉定州

高標山 在州西一名高望山巍然高峙萬象在前舊有層樓境內風月之勝一目可盡宋范成大○若為喚得涪翁起題作西南第一樓

白崖山 在州北八十里山有清風白雲朝露三洞

昔徐庸先生嘗於此著書又我眉縣亦有白崖山下有龍池

龍門山 在我眉縣西一十里兩崖峭峙其形如削仰觀青天僅露一罅相傳孫思邈棲真之所所有種玉溪真人巖藥竈藥臼朝真臺養龍潭線水崖虎跳石茶蘩洞瀑布崖

中峩山 在我眉縣南二十里又名覆蓬山劉向列仙傳周成王時葛由嘗騎木羊上此山有葛仙洞諺云得綏山一桃雖不得僊亦足以豪故亦名綏山元和志云有古穴初纔容一人行數里漸寬穴有蝙蝠

大如箕。

小峩山 在峩眉縣南三十里一名鐮刃山與中峩

大峩山相連是為三峩宋趙抃○蜀山天下奇三峩

壓峨壓岷右誰謂孤劍外名出高華後。

大峩山 在峩眉縣西一百里兩山相對如蛾眉故

又名峩眉山周迴千里有石龕一百十二大小洞四

十南北有臺重巖複澗莫測遠近李白○峩眉山月

半輪秋影入平羌江水流謂此

化山 在夾江縣西三十里峯巒秀麗俯臨雅江寰

宇記天下二十四化此其一也晉李士阿真人煉丹於

此

榮德山 在榮縣東北四十二里其高插天一名老

君山山有仙人修道石室二十四所其半有唐刺史

薛高磨崖碑

治易洞 在九頂山郡守吳秘銘上有磨崖大字云

聖作易晦其數劉傳吳識易祖蘇軾詩○自昔遙聞

太守高明爰象豕日忘勞洞中陳迹今如掃斯道何

曾損一毛。

方響洞 在州學前洞中有水冷然如環珮聲舊名

丁東水宋黃庭堅改今名詩○古人題作丁東水自

古丁東直至今。我為更名方響洞。信知山水有清音。  
 火井 在邛縣西八十里。博物記云井深二三丈。以  
 竹木投取火。後人以火燭投井中。火即滅絕不復然。  
 又蜀都賦註先以家火投之。須臾光焰上騰。以竹筒  
 盛之。接其光而無炭也。取井火還煮井水。一斛水得  
 四五斗鹽。家火煮之。不過二三斗鹽耳。

瀘州

安樂山 在合江縣西五里三峯奇秀。隋劉真人登  
 仙於此。上有延真觀及石櫃。左有石棋局。金線泉。後  
 有僊魚影。隱隱石壁中。右歷楠木臺。仙人室。十二盤

至剪刀峽。循山有八洞。通南巖。有石曰許由瓢。又有  
 芙蓉城。滴水崖。白猿洞。唐先汪詩。○碧峰橫倚白雲  
 端。隋代真人化蹟。殘翠栢不凋。龍骨瘦石。泉猶在鏡  
 光寒。一身迥向天邊立。萬壑皆從腳底看。莫道烟霄  
 無路上。但存仙骨到非難。

榕山 在合江縣南五里。俗名容子山。宋嘉熙中嘗  
 於此築城。山上有天符葉。如荔支葉而長。有紋如蟲  
 蝕篆。不知何本。或以為劉真人仙蹟。蘇軾詩。○天師  
 化去知何日。玉印相傳世共珍。故國子孫今尚在。滿  
 山秋葉豈能神。



滴乳巖 在州城西宋黃庭堅嘗經此書滴乳泉三字

先氏巖 在合江縣北六十里唐神童先汪讀書處元涼國公趙世延有記學士虞集跋云涼國勲業譽望著於天下又以文章學問為吾道砥柱讀書巖之記序其源委博瞻考據鄉里晚生後進蓋有不及聞者吾蜀故家舊族若先氏之巖者多有之矣安得一表章於大臣元老之手乎

雅州

曬經山 在榮經縣北二十里相傳唐僧二藏嘗於此曬經

雅州去州數十里石壁一帶有筆鋒長短數千下有深巖懸石數百皆五彩錦川文石青白紅紫燦爛奪目至此而精神為之恍惚也

呼應臺 在峨眉縣西南相傳唐天寶初孫思邈導行雲至庭墀見玄宗求賜武都雄黃勅遣中使往賜至山中不知其棲隱處因置之巖上炷香宣詔俄見其形謂使者但留雄黃自取之石上有朱書謝表旋錄旋滅

龍州宣撫司

牛心山 在司東南一百五十里山秀拔形如牛心

昔李龍遷葬於山側。唐武氏革命，鑿斷山脈，水赤如血。玄宗幸蜀，有老人蘇坦奏龍州牛心山國之祖墓，今日蒙塵之禍，乃則天掘鑿所致。玄宗即命刺史修填如舊。未幾，誅祿山，乃升州為都督府，賜號靈應郡。

黎州安撫司

仙人洞 在白崖山北，穴如車輪，欲入者必匍匐方能過。其中空澗行數十步，泉聲琮琤，石髓溜結，幽致萬狀。

乾蒸洞 在避瘴山有二洞，一空澗高燥，一有水出其中，有床坐竈突之類，皆崖石自生，不假人為。凡瘴欲動時，飛鳥皆集此山，瘴已乃出。上人欲知無瘴，以鳶為候，然鳶出必在立春前後。古謂飛鳥得氣之先於鳶，亦可見也。

梵音水 在司城南一十五里，俗傳唐僧三藏至此，持梵音而泉湧出，故名。色如米泔，味甘。宋政和間，太守宇文侯過而飲之，曰佳泉也。易名粲玉泉。泉南數十步有二巨石，一號袈裟石，五色相間，一號曬經石，皆三藏遺蹟。

古蹟

三藏梨 在舊黎州治小廳東，世傳唐三藏游西域

經行植梨杖於此云他日州治在此後果遷如其言  
其後梨成株高五丈圍九尺宋天聖間州治火人取  
其枝以接他株

平茶洞長官司

諸葛洞 在司治南石崖屹立傍有石洞數丈相傳  
諸葛亮征九溪蠻嘗過此留宿洞中設一床懸粟一  
握以秣馬後遂化為石床石粟至今猶存

成都府

通仙井 府治嚴真觀內相傳此井與廣漢縣竹縣  
君平宅井相通往歲有人淘井得銅錢二徑可二寸

因恍惚不安復投井中立愈或謂此君平擲卦錢也  
牡丹坪 灌縣西南八十里自青城之長平山捫蘿  
而上由鳥道三十里許平阜數十畝有高樹蔽天春  
深先花後葉狀若芙蓉香類牡丹譙定夫李浩隱其  
中宋范成大○千丈牡丹如錦蓋人間姚魏敢爭先

夔州府

鳳山 大寧治東一名東山木石蒼翠景物幽絕宋  
時邵守暇日窮討得月窟雲巖釣雪玉環浮玉寶華  
之勝

二仙洞 大寧治東北一十七里鹽泉側峭壁上有

石紋如人相對起伏狀洞中有仙骨長丈餘洞前有池不竭

三寶洞 梁山治西北三十里門外峰列若寶珠中有石龍鱗瓜宛然

眉州

老翁井 在墓顯山上一名老翁洞洞中有泉常有白蟹現又為四目老人真府唐末楊太虛朱真人皆得道於此旁建祠有二仙石像四目居中蘇軾○井中老人悟年華白沙翠竹公之家公來無蹤去無跡井面團團水生花翁今與世兩何處無事紛紛驚

牧豎改顏易服與世同無使世人知有翁

嘉定州

千佛崖 夾江縣西八里數峰嶄然崖石峭拔昔人鑄佛毋慮千數西岩瀑布響震林壑

第一洞天 州治西十里洞敞深邃可坐三四十人弘治間提學僉事王敕伐草萊得之定今名以配峨山之勝

爛柯洞 州治對江岩有東坡大書爛柯岩洞四字詩○但得身閑便是仙眼前黑白漫紛然請君試向岩中坐一日真如五百年

仙掌洞 夾江縣北舊傳李阿真人所遺宋人書其壁○跨龍門飲蟹泉糜仙掌扣丹竈

思娥洞 在瀘州治西南二百里初入稍隘已乃弘廣石髓疑結千態萬狀宛若堂亭

瓦屋山 在雅州榮經治北一百二十里或問禪惠太師瓦屋何似木皮惠師答曰錦府豈從機上織劍門寧自匣中開

記文

我眉山行紀

宋 范成大

我眉有三山為一列曰大我中我小我中我小我皆

傳有游者今不復有路惟大我其高摩霄為佛書所記普賢大士示現之所自郡城出西門濟燕渡水洶湧甚險此即雅州江其源自雋州邛部合大渡河穿夷界千山以來過渡宿蘇稽鎮過符文鎮兩鎮市井繁遛懸符文出布村婦聚觀於道皆行而績麻無素手者民皆束艾蒿于門燃之發烟意者熏袂穢氣以為候迎之禮至我眉縣宿癸巳自縣出西門登山過慈福普安二院白水莊蜀村店十二里龍神堂自是彌谷春淙林樾雄深小憩華林院過青竹橋我眉新觀路口梅樹壩兩龍堂至中峰院院有普賢閣回環

名山記 卷之四 三十一  
十數峰繞之背倚白崖峯右傍最高而峻挺者曰呼  
應峰下有茂真尊者庵孫思邈隱我眉時與茂真常  
相呼應於此云出院過樟木牛心二嶺及牛心院路  
口至雙溪橋亂山如屏簇有兩山相對各有一溪出  
並流至橋下石壑深數十丈窈然沉碧飛湍噴雪奔  
出橋外則入岑蔚中可數十步兩溪合以投大壑淵  
渟凝湛散為溪灘灘中悉是五色及白質青章石子  
水色麴塵與石色相得如鋪翠錦非摹寫可具朝日  
照之前則有光彩發溪上倒射巖壑相傳以為大士  
小現也牛心寺三藏師繼業自域歸過此將開山兩

石鬪溪上攬得其一上有眉目以為寶瑞至今藏寺  
中此水遂名寶現溪自是登危磴過菩薩閣當道有  
榜曰天下大峩山遂至白水普賢寺自縣至此皆峻  
阪四十餘里然始是登峰頂之山脚耳○甲午泊白  
水寺謁普賢大士銅像國初勅成都所鑄有太宗仁  
宗真宗三朝所賜御製御書百餘卷七寶冠金珠嬰  
珞袈裟金銀餅鉢奩爐匙筴果壘銅鐘鼓鑼磬蠟茶  
塔芝草之屬又有崇寧中宮所賜錢幡及織成紅幢  
等物內仁宗所賜紅羅紫繡袈裟上有御書發願文  
曰佛法長興法輪常轉國泰民安風雨順時干戈永

息人民安樂子孫昌盛一切衆生同登彼岸嘉祐七年福寧殿御札記次至經藏亦朝廷遣尚方工作寶藏也正向爲樓閣兩傍小樓便戶釘鉸皆以鍮石極備奇靡相傳純用京師端門之制經書造於成都用碧礪紙銷銀書之卷首悉有銷金圖畫各圖一卷之事經兼織輪相鈴杵器物及天下太平皇帝萬歲等字於繁花褥葉之中今不能見此等織文矣○次至三千鐵佛殿云普賢居此山有三千徒衆共住故作佛鑄甚朴拙是日禱于人士丐三日好晴以登山乙未果大霽遂登上峯自此登峯頂光相寺七寶巖其

高六十里大畧去縣中平地不下百里又無復蹊蹬斫木作長梯釘巖壁緣之而上意天下登山險峻無此比者余以健卒挾山轎強登以山丁三十三曳大繩行前挽之同行則用山中梯轎出白水寺側門便登點心山言峻甚足膝點於胸云○過茅亭嘴石子雷大小深坑駱駝嶺簇店凡言店者當道板屋一間將有登山客則寺僧先遣人煮湯於店以俟蒸炊又過峯門羅漢店大小扶捍錯喜歡木皮里胡孫梯雷洞平凡言平者差可以託足之處也雷洞者路左深崖萬仞蹬道缺處則下瞰沉黑若洞然相傳下有淵

水神龍所居凡七十二洞。歲旱則禱于第三洞。初接香幣不應，則投死蚌及婦人髮履之類，以振觸之。往徃雷風暴發，峯頂光明，岩上所謂兜羅綿雲亦多出於此。○洞過新店八十四盤，娑羅平。娑羅者，其木葉如海桐，又似楊梅花，紅白色。春夏間開，惟此山有之。初登山半，即見之。至此滿山皆是大抵峨之上。凡草木禽蟲悉非世間所有者。余來以季夏數日前，雪大降，木葉猶有雪漬爛斑之跡。草木之異有如八仙而深紫，有如牽牛而大數倍，有如蓼而淺青。聞春時異花猶多，但是時山寒，人鮮能識之。草葉之異者亦不

可勝數。山高多風，木不能長，枝悉下垂。古苔如亂髮，鬚挂木上，垂至地，長數丈。又有塔松狀似杉而葉圓細，亦不能高，重重偃蹇如浮圖。至山頂尤多，又斷無鳥雀。蓋山高飛不能上。○自娑羅平過思佛亭，軟草平，洗脚溪，遂極峰頂，光相寺亦板屋，無人居。中有普賢小殿，以卯初登山至此已中。後初衣暑，綵漸高，漸寒，到八十四盤則最寒。比及山頂，亟挾纊兩重，又加毳衲，馳茸之裘，盡衣筒中所藏，繫重巾，躡氈靴，猶凜慄不自持。則熾炭擁爐，危坐山頂，有泉煮米不成飯，俱碎如砂粒。萬古冰霜之汁不能熟物。余前知之自



山下携水一缶來纔自足也○移頃冒寒登天仙橋  
至光明岩炷香小殿上木皮蓋之王瞻叔叅政嘗易  
以瓦爲雪霜所薄一年輒碎後復以木皮易之翻可  
支二三年人云佛現悉以午今巳申後逡巡忽雲出  
岩下傍谷即中雷洞山也雲行勃勃如隊仗既當岩  
則少駐雲頭現大圓光雜色之暈數重倚立相對中  
有水墨影若仙聖跨象者茶頃光沒而其傍復現一  
光如前有頃亦沒雲中復有金光兩道橫射岩腹人  
亦謂之小現日暮雲物皆散四山寂然○乙夜燈出  
岩下徧滿彌望以千百計夜寒甚不可久立丙申復

登岩晚望岩後岷山萬重少北則屋瓦山在雅州少  
南則大瓦屋近南詔形狀宛然瓦屋一間也小瓦屋  
亦有光相謂之辟支佛現此諸山之後即西域雪山  
崔嵬刻削凡數十百峯初日照之雪色洞明如爛銀  
晃耀曙光中此雪自古至今未嘗消也○山綿延入  
天竺諸番相去不知幾千里望之但如在几案間瑰  
竒勝絕之觀真冠平生矣復詣岩致禱俄氛霧四起  
混然一白僧云銀色世界也有頃大雨傾注氛霧辟  
易僧云洗岩雨也佛將大現兜羅綿雲復布岩下紛  
郁而上將至岩數丈輒止雲平如玉地時雨點猶餘

飛俯視岩腹有大員光。偃卧平雲之上。外暈三重。每  
重有素黃紅紫之色。光之正中。虛明凝湛。觀者各自  
見其形。現於虛明之處。毫釐無隱。一如對鏡。舉手動  
足影皆隨形。而不見傍人。僧云。攝身光也。此光既沒。  
前山風起。雲馳風雪之間。復出大圓相光。橫亘數山。  
盡諸異色。合集成采。峰巒草木皆鮮妍絢藉。不可正  
視。雲霧既散。而此光獨明。人謂之清現。凡佛光欲現。  
必先布雲。所謂兜羅一世界。光相依雲而出。其不依  
雲。則謂之清現。尤難得。食頃光漸移過山而西。○左  
顧雷洞山。復出一光如前。而差小。須臾亦飛行過山。  
外至平野。間轉徙得與岩正相直。色狀俱變。遂爲金  
橋。大畧如吳江垂虹。而兩紀各有紫雲捧之。凡自午  
至未。雲物淨。謂之收岩。獨金橋現。至酉後始沒。○丁  
酉下山。始登山時。雖躋攀艱難。有繩曳其前。猶嶮而  
不危。下山時。雖復以繩縋輿。後梯下輿。夫雖著脚。既  
嶮且危。下山漸覺暑氣。以次減去。綿衲午至白水寺。  
則絺綌如故。聞昨暮寺中大雷雨。峰頂夕陽快晴。元  
不知也。○食後游黑水過虎溪橋。奔流激湍。大畧似  
雙溪。而小不及。始開山僧自白水尋勝至此。溪漲不  
可渡。有虎蹲伏其傍。因遂跨之。亂流而濟。故以名溪。

黑白二水皆以石色得名黑水前對月峰棟宇清潔  
宿寺中東閣秋七月戊戌朔離黑水○復過白水寺  
前渡雙溪橋入牛心寺雨後斷路白雲峽水方漲碧  
流白石照入肺肝如層冰積雪中藍輿下行峽淺處  
以入寺飛濤濺沫襟裾皆濡境過清毛髮盡竦寺對  
青蓮峰有白雲青蓮二閣最佳牛心本孫思邈隱居  
相傳時出諸山寺中人數見之小說亦載招僧誦經  
施與金錢正此山故事有孫仙煉丹竈在峰頂又至  
淘米泉在白雲峽最深處去寺數里水深不可涉獨  
訪丹竈傍多奇石祠堂後一石尤佳可以箕踞宴坐

名玩丹石寺有唐畫羅漢一板筆跡超妙眉目津津  
欲與人語成都古畫浮屠像最多以余所見皆出此  
下蜀畫胡僧惟盧楞迦之筆為第一今見此板乃知  
楞迦源流所自餘十五板亡之矣此寺即繼業三藏  
所作業姓王氏耀州人隸東京天壽院乾德二年詔  
沙門三百人入天竺求舍利及貝多葉書業預遣中  
至開寶九年始歸寺所藏涅槃經一函四十二卷業  
於每卷後分記西域行程雖不甚詳然地里大畧可  
考世所罕見錄于此以備國史之闕○業自階州塞  
西行由靈武西梁甘肅瓜沙等州入伊吳高昌焉者

于闐踈勒大石諸國。度雪嶺至布路州國。又度大葱嶺。雪山至伽濕彌羅國。西登大山。有蔭瑤太子投崖飼虎。遂王徤施羅國。謂之中印土。○又西至庶流波國。及左攔施羅國。有二寺。又西過四大國。至大曲女城。南臨滔牟河北。背洹河塔廟甚多。而無僧尼。○又西二程有寶塔。故基又西至波羅柰國。兩城相距五里。南臨洹河。又西北十許里至鹿野苑塔廟。佛蹟最夥。業自云。別有傳記。今不傳矣。○南行十里渡洹河。河南有大浮圖。自鹿野苑西至摩羯提國。館於漢寺。寺多。祖入八村。隸焉。僧徒往來如歸。南與杖林山相

直。巍峰巋然。山北有優波掬多石室。及塔廟。故基西南。百里孤山。名鷄足。三峰云是迦葉入定處。○又西北。百里有菩提寶座城。四門相望。金剛座在其中。東向。又東至尼連禪州。東岸有石柱。記佛舊事。自菩提座東南五里。至佉苦行處。又西三里。至三迦葉村。及牧牛女池。金剛座之北門。有師子國迦藍。○又北五里。至迦耶城。又北十里。至迦耶山。云是佛說寶雲經處。又自金剛座東北十五里。至正覺山。又東北三十里。至骨磨城。業館於鰍羅寺。謂之南印土。諸國僧多居之。又東北四十里。至王舍城。東南五里有降醉象

塔○又東北登大山細路盤紆有舍利子塔又臨澗  
有下馬迎風塔度絕壑登山頂有大塔廟云是七佛  
說法處山北平地又有舍利本生塔其北山半曰鷲  
峰云是佛說法華經處山下即王舍城城北山址有  
溫泉二十餘井又北有大寺及迦蘭陀竹園故迹又  
東有阿難半身舍利塔温湯之西有平地直南登山  
腹有畢鉢羅窟業止其中誦經百日而去窟西復有  
阿難證果塔○此去新王舍城八里日往乞食會新  
王舍城中有蘭若隸漢寺又有樹提迦故宅城其西  
有輪王塔又北十五里有那爛陀寺寺之南北各有

數十寺門皆西向其北有四佛座又東北十五里至  
烏巔頭寺東南五里有聖觀自在像又東北十五里  
至伽濕彌羅寺寺南距漢寺八里許自漢寺東行十  
二里至却提希山又東七十里有鴿寺西北五十里  
有支那西寺古漢寺也西北百里至花氏城育王故  
都也○自此渡河北至毗耶離城有維摩方丈故跡  
又至拘文那城及多羅聚落踰大山數重至泥波羅  
國又至磨逾里過雪嶺至三耶寺由故道自此入階  
州太祖已晏駕太宗即位業請闕進所得梵夾舍利  
等詔擇名山脩習登峩眉北望牛心衆峰環翊遂作

菴居已而為寺業年八十四而終○出牛心復過東峰之前入新峨眉觀自觀前山開新路極峻斗下冒雨以游龍門竭蹙數里歛至一處澗溪自兩山石門中湧出是為龍門峽也以一葉舟棹入石門兩岸千丈岩壁色如碧玉刻削光潤入峽千餘丈有兩瀑布各出一巖頂相對飛下嵌根有盤石承之激為飛雨濺沫峽舟過其前衣皆沾濕又數丈半若有圓龕去水可二丈以木梯升之即龍洞也○峽中緝碧無底石寒水清非復人世舟行數十步石壁益峻水益湍亟回棹舟人云前去更奇以雨大作加飛瀑沾濡暑

肌起栗骨驚神懣凜乎其不可以久留也○昔嘗聞峨眉雙溪不減廬山三峽前日過之真奇綺及至龍門則雙溪又在下風蓋天下峽泉之勝當以龍門為第一然其路峻絕亂石當道將至峽必捨輿躡草履經營傾步於槎牙兀嶮中方至峽口蓋大峨峰頂天下絕觀蜀人固有罕游而龍門又勝絕於山間游峨眉者亦罕能到非好奇喜事忘勞苦而不憚疾病者不能至焉

游峨山記

明沔陽陳文燭

昔蘇子瞻言天下山水在蜀蜀山水在嘉州非謂峨

山哉余少讀范成大峨嵋山記比長管子建初惠余峨  
山圖欣然神往萬曆甲戌奉

命督學事冬試嘉州僉憲關中商叔後約余同游雪  
大不果乙亥再試少寮石首王引瞻修撰富順李元  
甫使蜀三人雅善訂共游焉乃王李奪于公期而余  
獨往時九月朔日也嘉守鍾玉甫別余郭門行三十  
里至蘇稽渡卽長公讀書處也行十餘里懋德山寺  
望三峨插天雲氣如赤珠如白鵠如行人鱗鱗不可  
名狀讀宋英宗御製別山碑別山者開山寺僧有經  
行者懋聖積寺登老寶樓覽魏鶴山峨峰真境四字

寶亦宋僧別山者流有東明沙門年九十擁錫而迎  
素與新都楊用修青城余懋昭游藏二公詞翰余爲  
老僧像贊而出出過解脫橋懋華巖寺讀宋紹興碑  
發溼槃之蘊演勿照之明令人爽然至楠木坪樹如  
寶蓋葱菁十餘里見溪下一石類舟人云此普賢船  
也至大峨石上有陳圖南福壽二字石前有流盃池  
余爲神水贊而去去登歌鳳臺卽楚狂隱處也懋中  
峰寺玩孫思邈藥鼎丹竈其形甚古懋牛心寺寺下  
爲雙龍橋兩水分流石梁跨之蓋天成云過梁渡溪  
懋後牛心寺玩唐三藏取經時所遺卓錫非人間物

名山記 卷之四 三  
國初高僧寶曇圓寂于此或言

高皇帝同時僧廣濟避居峨山後宮中聞龍躍聲詔  
易前杖莫可考耳由四會亭經南戒名宗坊投白水  
寺宿焉訪唐濬師彈琴處堙滅也有鎮南沙門與之  
語合言師別傳年七十游南海三十年前種樹千百  
今鬱鬱蔭此山矣出內江學士趙孟靜衣契讀之謂  
充其心則宰衡吐握一人才可種也洙泗指迷千  
載人才可種也余味其言書短歌寄焉越二日鎮南  
隨余登頂心坡坐筍輿用布懸引而上經息心所大  
小深坑有長老坪差覺平坦喬木千章下雲摩蒼交

錯糾紛古蘿蔓延下垂人云此普賢線也行至鷲店  
飛岑嶙峋過木皮殿上胡孫梯歎霧濛濛咫尺莫辨  
過梅子坡至雷洞坪有禁人語鐵牌恐風雷忽震由  
此轉折八十七盤最上娑羅坪蓋有娑羅花云捫石  
穿林黯黯不見天日巖下魄礧多千年積雪冰氣皚  
皚射人已入天門石度天仙橋投光相寺宿焉老僧  
取水炊飯爲言頂有池水無泉脉可給千人炊米數  
沸中食過百沸則心結粉粒反不可食卧必累縛坐  
必執鑪其寒慄異常云越三日沐浴禮普賢大士祈  
家按察公壽舊有銅鐵錫三殿今存鐵瓦殿云有通



名山記 卷之四 三十一  
天沙門年八十。薙草開林。表一小刹。不下山五十年。自言此山無豺虎。草木皆香。西域寶掌千歲僧也。名此爲震旦國第一山。四顧遙指其近而倚者曰瓦屋。羅回其遠而望者曰青城玉壘。其最見者曰雪山。晒經而火焰葱嶺。與諸蕃之界俱在。縹緲其餘萬山。真如培塿。青衣洋瀆三江。縈然如匹練。使余應接不暇。少頃。靉靄雲布。兩人復歸禪房。有披髮道人。衣樹皮。不言姓名。坐風雪年餘。余招之來。杜口。振手意在服食。咽氣與通天。意有所託。而逃焉者也。長揖別去。余就枕。越四日。再登浮雲。忽開。太陽吐扶桑。和如豔陽。

步觀佛臺。有小鳥如鸚鵡。依人而來。鳴曰佛現。佛現視之。閃閃成暈。青黃紅綠之色。圍繞數重。初見若車輪。既而圓徑漸廣。跨過山足。觀者如對鏡。惟見己身。雖並立者不見。人云此普賢身也。有鼯鼠亦來親人。或言山有雲霞氣。日映之則光。鳥鼠亦忘機者。通天飯。余禪榻授余養生之秘。坐更餘。一僧報曰聖燈現矣。疾走現光臺。始見其一如火。漸至數百。時隱時見。僧云往。吹入殿中。信手掇之一木葉耳。理或有焉。余就枕。越五日。又登絕頂。日大明如昨。一僧携放光石。如水晶。大者徑三四分。就日照之。成五色如虹霓。望

七寶臺在深崖與通天別。從故道下山崇峰懸磴白雲護之。渾如銀色。世界樹間啼猿小者如拳。暮宿白水寺。有妙境沙門。自西遊還。從師高僧筍峰。歷五臺南海道場。談之津津有味。越六日至黑水寺。訪八音池。每盛夏有水。人鼓掌則羣蛙鳴。其起止俱先一蛙。如金聲玉振。有白玉環。探之光潤異常。乃千年物。豈晉慧通慧持皆遠公高弟。游此遺之邪。暮宿老實樓。有鑑燈沙門。了大藏爲言。蔭法雲則火宅亦涼。曜慧日則昏夜可曉。儒釋異邪。又愛詞翰。余檢家按察公見南江閣詩文。選付馬壯哉司馬。遷之著作藏名山。

嚴君平之九州游八也。乃佐理此山。舍此山將何所藏哉。鑑燈指龍門洞二岷三岷諸勝。莫能窮也。大都廣圍千里。高百三十里。余得其槩。暮宿峨眉縣。越八日。王李二君書來詢游狀。余報曰。茲山善畫者莫能圖也。果右軍之緣。讀太白之歌。勉旃哉。以五七言古十四章絕句二章復焉。

昔楊用修評字內諸名勝。其言某也。玲瓏剔透某也。巉差竄窳某也。綿衍龐魄某也。俊峭巧麗。雖皆可入圖畫。然特各具一體。至蛾眉則兼有之。所謂集山之大成者也。予讀宋范先生記。記其道路之

遠近山巒登陟之艱難可謂詳且明矣及未軒方  
先生寄五岳陳公所記蛾眉之遊則又廣大悉備  
與所接方外淄流不一而足益見山川之深奧可  
以棲息視范益詳可謂發所未發矣而文之奇古  
尤爲過之然則晉江林君詩雲所云寶刹飛岑歷  
歷如畫而所接崇明鎮南若與異人者游後之攬  
斯文者將駕茲山於匡羅天台武夷之上匹五嶽  
而六之不待披圖周覽而始見者信不誣也予故  
喜而鋟梓以廣其傳將與范公之作並垂不朽云  
萬曆八年庚辰春吳興歸安山泉慎蒙題

建浣花草亭記

陳文燭

浣花草堂杜工部舊居也楊文忠公記之詳矣余入  
蜀游焉因歎曰有唐至今赫赫盛哉何無以茅爲亭  
者乃鍾祥劉公庠安陸楊公芷番禺王公原相餘姚  
周公思充肥鄉張公思忠長洲杜公詩平定甄公敬  
命經歷王忠創爲之而題曰乾坤一草堂俾當年所  
營茅屋千載如新也余坐其中見層軒所面卽百花  
潭水而幽澄入戶足消客愁者又鷗鷺飛鳥時相上  
下風月之夕則橙林翠竹作嗚嗚聲如垂老之別無  
家之歎忠臣義士聞者淚不可禁亭外老樹飽歷霜

雪其凌霄之狀若俯挺之之子而小之流落景光咸  
在亭中假令子美有知當驚二三公知己于百世之  
後矣嗟乎祿山之亂遠依嚴武在唐上元間公有大  
不得已者方其茅屋爲風所破歎曰安得大唐厦更  
被天下寒真壯士哉可以許稷契矣後世奈何以詩  
人之雄槩子美哉記之俾修亭者無忘誅茅之意云  
序事簡古詞旨壁立

重修瀼西草堂記

陳文燭

昔人謂杜子美夔州以後諸詩蓋最工云考先生自  
成都下瞿塘浮湘望洛而寓于夔門其居三徙有瀼

東有東屯而瀼西尤著地多平曠田可水稻先生出  
峽卽易其主而所手書券宋元間得而珍之後日荒  
圯萬曆改元夔守郭君棐訪遺址檄奉節令羅繡藻  
新祠事肖先生像太守能文章有記述而又請余碑  
焉余奉

天子璽書宣教化例得旌揚古今忠義之士徘徊祠  
下不覺泫然也憶先生獻賦時玄宗大奇之命宰相  
試其文拜左拾遺乃高自稱道先世以來多以文獻  
若薄楊雄枚臯不爲者其衿誕一時有祖審言之風  
會祿山亂輦轂入蜀避走三川肅宗立往救房琯至

不省錄嚴武節度劔南復依焉表爲叅謀檢校工部員外郎先生久于夔及茲堂之建其時有足悲者而史稱先生挺節不污所謂詩歌善陳時事千彙萬狀兼而有之忠君憂國每飯不忘當時韓愈氏高其文章光燁至長萬丈也真知言矣語曰生無一日歡死有萬世名先生之謂乎先生襄陽人與孟浩然友善襄陽舊有孟亭不存而峴山祠先生者亦荒今瀼西更新比效同谷浣花可謂無關世教哉予因記之以俟來者其

右三記宜列之于後因皆陳先生所作故彙刻之

### 牛頭山工部草堂記

明 陳文燭

潼川蓋唐梓州境而牛頭山在郭門外杜工部嘗登其上所云三載客蜀郡一年居梓州是也叅知梁尚賢憲使王元德分鎮劔南捐金度木命刺史張輝南爲草堂于山巔余試士過焉刺史乞余記之嗟乎公遭祿山之變飄零于蜀或自綿而梓或自閬而梓坎壈之狀千載流涕而誦其詩者興忠君愛國之思卽公在梓州詩如王侯與螻蟻同盡隨丘墟願聞第一義廻向心地初子瞻歎其以詩入道猶庖丁以牛入也輪扁以輪入也蘇氏知公乎是公詩多于蜀而妙

悟于梓公神其託茲山哉。天壤俱敞可矣。昔唐陳子昂梓州人。公過射洪學堂。撫遺跡而吊焉。有盛事會一時。此堂豈千年之詠。若爲今日而言者。則牛山數椽。與金華並峙。乃不穀之慨慕于公。奚啻公于伯玉哉。浣花讓西。余業有記。而今又託乎片言。其有私感與。若謂能飽公殘膏賸馥。而揚摧之。則余豈敢。

鮮于氏離堆記

顏真卿

閬州之東百餘里。有縣曰新政。新政之南數千步。有山曰離堆。斗入嘉陵江。直上數百尺。形勝縮蠶。歛壁峻。上崢嶸而下迴。狀不與衆山相連屬。是之謂離。

堆東面有名堂焉。卽故京兆尹鮮于君之所開鑿也。堂有室。廣輪袤丈。蕭豁洞敞。虛聞江聲。徹見人羣。象人村川。坳若指諸掌。堂北磐石之上。有九曲流杯池焉。懸源螭猶蹙噴。鶴味醞渠股引。迺坐環溜。若有良朋。以傾醇酎。堂南有茅齋焉。游於斯。息於斯。聚賓友於斯。虛而來者。實而歸。其齋壁間有詩焉。皆君舅著作郎嚴從君。甥殿中侍御史嚴僊之等。羨君考槃之所作也。其右有小石。虛焉亦可蔭而踐據矣。

新都縣真多山題名

漢張飛

王方平采藥此山。童子歌玉鑪。三澗雪信宿乃行。

唐人刻石龍多山

此山高明窈深變態萬狀下視涪水如帶煙雲出沒山之偉觀也

三游洞記

明 林俊

西陵溯峽二十餘里攀斗磴而上徑險處腰折厓底數十武乃至洞空窈玲瓏上覆如屋外幽內敞可坐百許人一石上懸扣之如鐘椎其地逢逢然所謂天鐘地鼓者唐白氏兄弟元微之同游名三游宋蘇氏兄弟黃山谷又皆至焉予足迹半天下名區奇境雖險必至是洞與徽之東坡齊名幽絕東坡必當北面

焉

少岷山記

明 呂柟

少岷山者蜀故安樂山也在合江之西三峯削立十有二盤絕巔如雲門又如雉堞古木蒼藤鏤霞映日其南也為榕山二石聳峙其巔萃嶽截葉曰乾峯之溪自仁懷山來縈少岷而東下與月臺溪會其前而入于汶江汶江即岷江也自茂州而來乃過少岷山蒙泉在少岷山中無水雩則獲水獲水則雨延真觀在山畔居緇流可以憇焉初地官曾璵讀書安樂嘗出游大岷登青城天鼓覽觀七十二洞歷汶川八盤

龍泉慈母遂上雲山數乳川白狗之峰西望煎氏東  
瞰江流朝宗于海粵瞻泮河顧瞻隴首返曰岷下山  
莫如吾安樂故改安樂為少岷山思終身焉涇野子  
曰昔漢逸民肥遯西充肆今充有南岷山東石之志  
柝故知之豈惟何生哉其使少岷與大岷齊名萬載  
乎夫大岷連峰千里江水出焉東潤荆楊吳越北與  
崑崙黃河爭功海內少岷之志其在斯乎

曲水留題

宋 朱燾

或言雲安西三十里許有自然曲水閏月甲午朔泊  
舟橫石灘上携子屋及劉甥步訪之水極峻急不可

流觴巖顏有永和三年及六年刻字十五六行剥落  
已不可讀細辨其文但昔人捐金以事仙佛識金數  
于石爾殆非禊飲處也好事者因年號遂增飾之當  
時必置屋廬象設今變滅無餘然水石要可喜姑取  
酒酌其旁賞晤良久乃去

卧龍紀行

宋 閻蒼舒

余初自宣威幙府送季長奏事北闕入道山為學士  
後三年余始被命造朝遂玷論思之列今丐祠得請  
而歸會季長護漕夔門相與道舊故握手驚嘆蓋濶  
別已十年矣同游卧龍山松風肅爽雲日蔽虧千載



英靈恍若來下晚趨躍馬城赤甲白鹽峻極天半晴  
光返照瀆浪帖伏慈明行酒道韞誦詩至大醉而去  
不圖天涯為樂之至於斯也

香山寺行記

宋 黃庭堅

太守高仲本率南昌黃魯直墊江譚處道同來遠水  
喬木僧房高下景物清絕為獲路第一建中靖國元  
年二月庚申微雨中來

卧龍行記

宋 王十朋

永嘉王龜齡少城周行可海陵查元章載酒來游時  
凍雨初霽風日清美山谷明秀照人道傍襟花盛開  
籃輿徐行應接不暇寺有茶糜羅絡松上如積雪崇  
蘭數百本秀發崑石間微風透香所至芬郁東榮牡  
丹大叢雨前已開道人植蓋護持留以供客飲罷縱  
步泉上瀹茗賦詩而歸

卧龍紀行

宋 黃人傑

帥帳跨鰲陳損之繡衣具茨王璆聯轡登卧龍置酒  
高會賓客從者十有六人是日金虎嘯風丹雲蔽日  
涼生尊俎興在江山獻酬賡唱之餘挹大士泉訪海  
仙像塵慮息而神氣清晝漏垂盡乃去真勝游也

游漱王巖記

宋 喻汝礪

余飽聞閬中奇山川而賢士大夫最多亦復把酒自  
慰一日登錦屏挈舟嘉陵江步至占星巖徘徊縱觀  
倚老松卧怪石往往摩腹一咲然是三境之游須廢  
吾一日糧惟毋丘氏漱玉巖近在墻壁外乘興步履  
從小奚奴直謁賢主人脫衣散髮坐巖復酌酒賦詩  
相與作物外笑樂酒醉發狂即呼天大叫曰天乎真  
不負喻汝厲矣吾嘗謂富貴之士不能放意於江山  
松竹之樂而山川恠奇烟雲竹石詩酒風月唯遺逸  
未遇之人始得兼而有之故天地間雄偉不凡之處  
天所以資賢人而舒其憂愁之思者也吾零落荒山

鬱鬱無聊賴有錦屏嘉陵之雄偉占星漱玉之勝所  
謂閬之四奇者吾皆得而有之他日解官視吾破囊  
無復新井縣一物驅老鬚獨負四物以歸朋游故舊  
從吾覓閬中土物吾則與飲酒取吾詩而歌之則是  
四境者不移足而在几席間矣

麻姑洞記

唐 杜光庭

繁陽山麻姑洞即三十四化之第一陽平之別名也  
在繁水之陽因以為名本際經云大帥張道陵所游  
太上說經之處在成都府新都縣南陵江十五里衆  
山連接孤峰特起是也神武皇帝潛龍之時光化二

名山記 卷之四  
年己未五月四日丙申山土摧落洞門自開縣吏時  
康鄉所由楊靖道士張守真等以事申府云自洞門  
開後每日有百姓往來者府差縣典楊澤畫工任從  
同往檢覆畫圖申上稱把燈燭入洞看檢其第一門  
對北高二尺濶三尺五寸入至第二門約五尺以來  
第二洞門方一尺六寸入內並是黑處長一丈二尺  
闊六尺有石窟兩處在東畔并西南有洞門兩路南  
畔一路圓闊一尺六寸入內長一丈二尺闊一丈高  
四尺南畔有窟三處西畔兩路入內通遠門圓闊一  
丈七尺內各闊五尺高六寸以來門相去一丈門屋

一所高五尺闊四尺從內往來有刻料拱甍瓦約山  
作石日月兼作日字月字隔于房一所闊二尺五寸  
高一尺五寸刻料拱甍瓦石竈一所高一尺濶一尺  
五寸門闊五寸石窟三處各濶七尺又西入洞門圓  
濶一尺七寸彎曲入向南門屋一所高六尺濶四尺  
從內往來有石料拱甍瓦又有竈模兩所共一牀高  
一尺濶二尺三寸門闊八尺有石料拱甍西北角又有  
一門方一尺六寸四方二丈以來南畔西畔北畔各  
窟一所南角又有一洞圓闊一尺六寸以來將燈燭  
近前有黑氣出燈火即滅更入不得其洞連接繁陽

名山記 卷之四  
四  
本山相去三里以來其山據諸鄉張生張贊等狀稱繁陽是古跡山每隹勅祭祀其洞亦是元有往往閉塞元和中南康王韋臯蒞蜀洞忽開時人咸云洞門開卽年豐物賤尋又閉塞至是復開其後果豐稔其洞本名麻姑洞山側有麻姑宅基蓋修道之所也

温湯洞記

唐 杜光庭

開州後倚盛山東枕清江沂江而北三十餘里至温湯井井有湯泉北山麟德年震雷摧裂山脚洞山自開當門有天然石鍾如數千斤重空懸去地二尺許而中實扣之無聲門兩壁有石如金剛力士之形者

數輩鍾傍有小徑高六尺以來行二三丈稍濶有石碑巨龜負之自然而成但中無文字碑側有巨屏上與鼎相連下一穴側身入可一二尺許自是廣濶中路徑平坦與常無異路左右滴乳爲石羅列衆形龍麟鸞鶴頽雲巍山如林如柱似動似躍乍飛乍顧千形萬態不可殫紀僅一里許傍竦蓮臺周迴數步高三四丈層綴重疊皆可攀躋旋生乳石如臂如指者以燭照之通透瑩徹隨折脆斷及出洞門外得風皆爲白石矣自臺側三四十步步有蓮花羅布於地傍有甘泉水色温白游洞者汲之烹茗前自有橫溪湍

波甚急其聲喧洶流出洞外溪上有橋長二三丈濶一丈許非石非土功甚宏壯過橋得黃土坡高四五丈道徑險滑行者累息方至其頂坡上有巨堂四壁平靜中高數丈壁上多游人題記年月堂之極處曲角有一穴高四五丈廣三四尺去下丈餘躋攀莫及相傳云昔有游人扳緣而入累月之後出於巫山洞中自後無復敢入者 此洞可謂極奇

豆圍山記

唐 杜光庭

絳州昌明縣豆圍山真人豆子明修道之所也西接長岡猶通車馬東臨峭壁陡絕一隅自西壁至東峰

石笋如圖兩崖中斷相去百餘丈躋攀險絕人所不到其頂有天尊古宮不知所製年月古仙曾笮繩橋以通登覽而繩笮朽絕已久里中有言○欲知修績者脚下自生毛相傳如此咸通中山下有毛意歡者幼而爲道常持誦五千言著弊布褐於市乞酒醉而登山攀緣峭險以絕道爲橋山頂多白松樹繫之繩橫亘中頂布板椽繩上善男女隨而度焉數年繩朽橋壞無復緝者咸通歲令與賓客醮山於西峰時展禮毛師他游入謂令曰此峰之側有小徑抱崖纔通人迹無所攀援意歡常游此而去逾旬不出令疑其

名山記  
隱在穴中。座內有廣陵郭頭陀者，令請由此徑往探求之。頭陀久之驚眙，不能語。而後言曰：此徑去約三十餘丈，然後到穴口，纔三五尺，下去平地，猶數百尺。穴內可坐十餘人，中有巨木，圍緘鎖極固，意歡讀經處，石面平滑，有足膝之痕，而經卷在焉。不知意歡之所其家，有一妻一女而已，疑其得道者也。意歡每多持燈，攬度繩橋，山側居人視之，以爲常矣。山多毒蛇，猛虎，里中人莫敢獨往。意歡夜歸，亦無所畏焉。常有二鴉，客將至，必飛鳴，意歡整飭賓階坐榻，未畢客果至矣。

青城山記

杜光庭

壬子歲七月十三日，青城鬼城山因滯雨，崖崩瀑水大至。在丈人觀後，高百餘丈，殿當其下，將憂摧壞。俄有墜石如岸堰，水向東，竟免漂陷。觀中常汲溪水，以供日食，甚以爲勞。自此瀑水出處，常有流泉，直注厨內，其味甘香，冬夏不絕。東柱西柱，金州之北，乾元之南，六十餘里，地名東柱西柱。衆山連接，峯巒秀異。鄉人云：有山自南而來，北有巨石如柱，山穿柱過，因以爲名。又東有數峰峭拔，一峰最高，云是蒲仙上昇之所。蒲仙山下側，延崖上及溪澗中，有石版篆文，凡六

七處人多不識往往亦可尋見

焰陽洞記

唐 杜光庭

焰陽洞古老相傳在陵州陽山之上從來隱蔽人莫知處乾德三年辛巳正月十六日井監使保義軍使大保馬全章中夜一人褒衣束帶魏冠古服狀若道流揖之俱行崖壁所告之曰此焰陽洞也閉塞多年能開發護持可以福利邦國又指其地近開小徑亦斷之勿使常人賤踏言而去及旦全章往尋其所果見土勢微陷以杖導之深不可測即命本軍節級侯廣之勾當人無斲掘漸獲蹤由相次開掘見三重石

門其內並是細砂一無蟲蟻他物其洞自東及西深三丈九尺濶五尺三寸洞皆是石洞門第一重高六尺濶五尺二寸第二重門高五尺五寸濶三尺七寸第三重門高四尺七寸濶三尺五寸第三重門內從頂至底一向高六尺一寸其三重相去各口鑿鑿精巧迨非人力第三重南畔石房濶七尺四寸高四尺八寸深四尺二寸其後別有一小洞元有一片石遮掩其門傍通一縫以燈燭照之深不知其底北畔石房深四尺二寸濶七尺三寸高五尺其房內有石牀一所西畔小石房深二尺濶三尺五寸高三尺一寸

西北畔石牀長三尺八寸濶二尺八寸西北畔竈橫長二尺三寸門額濶七尺竈深八寸周圍三尺五寸從洞門向東一直至鹽井面相去四十一丈八尺洞門面正東全章召得當井監天師院見有元和年刺史李正卿著天師聖德碑云張天師以東漢建安三年自沛游蜀占乾為分野見陽山氣象指謂門弟子曰此門山直下有鹹泉焉今驗此洞正當井上即是熵陽洞也。洞內有房有竈有床可以言怪。

入蜀記

宋 陸游

六日過荆門十二碛皆高崖絕壁巖岩突兀則峽中

之嶮可知矣過碛望五龍及鷄籠山巖我正如夏雲之竒峯荆門者當以險固得名碛上有石穴正方高可通人俗謂之荆門則妄也○晚至峽州泊至喜亭峽門在唐為硤州後改為峽而印文則為陝州元豐中郎官何洵直建言峽與陝相亂請改鑄印文從山事下少府監而監丞歐陽發言湖北之陝州從阜從夾夾從陝西之陝州從阜從夾夾從偏旁不同本不相亂恐四方謂少府監官皆不識字當時朝士之議皆是發而卒從洵直言改鑄云○至喜亭記歐陽公撰黃魯直書七日見知州葉安行以小舟游西山甘



名山記 卷之十四 五十三  
泉寺竹橋石磴甚有幽趣有靜練洗心二亭下臨江  
山頗踈豁法堂之右小徑數十步至孝婦泉謂姜詩  
妻龐氏也泉上有龐氏祠然歐陽公不以為信故其  
詩○叢祠已廢姜祠在事迹難尋楚語訛又此篇首  
章○江上孤峰蔽綠蘿初謂孤峰蒙藤蘿耳及至此  
乃知山下為綠蘿谿也○又至漢景帝廟及東山寺  
景帝不知何以有廟於此歐陽公為令時有祈雨文  
在廟中東山寺亦見歐陽公詩距望京門五里寺外  
一亭臨小池有山如屏環之頗佳晚群集於楚塞樓  
遍歷爾雅臺錦障亭亭前海棠二本亦百年物爾雅

臺者圖經以為郭景純作爾雅於此○越八日乃  
過下牢關夾江見千峰萬嶂有競起者有獨拔者有  
崩欲壓者有危欲墜者有橫裂者有直坼者有凸者  
有窪者有罅者有罅者奇怪不可盡狀初冬草木皆青蒼不  
彫西望重山如闕江出其間則所謂下牢谿歐陽公  
有詩○入峽水漸曲轉灘山更多即此也○登三游  
洞躡石磴二里其峻處不可著脚洞大如三間屋有  
一穴通人過然陰黑峻嶮繚山腹偃僂自岩下至洞  
前差可行然下臨溪潭石壁十餘丈水聲恐人又一  
穴後有壁可居鍾乳歲久垂地若柱正當穴門上有

刻云黃大臨第庭堅同辛紘子大方紹聖二年三月  
辛亥來游旁石壁上刻云景祐四年七月十日夷陵  
歐陽永叔下缺一字又云判官丁下又缺數字丁者  
寶臣也字元珍今丁字下二字亦髣髴可見殊不類  
元珍字又永叔但曰夷陵不稱令洞外溪上又有一  
崩石偃仆刻云黃庭堅弟叔向子相姪微同道人唐  
履來游觀辛亥舊題如夢中事也建中靖國元年三  
月庚寅按魯直初謫黔南以紹聖三年過此歲在乙  
亥今云辛亥者誤也○泊石牌峽石穴中有石宛如  
老翁持魚竿狀九日過扇子峽重山相掩正如屏風

扇疑以此得名登蝦蟇碛水品所載第四泉是也蝦  
蟇在山麓臨江頭鼻吻頷絕類而背脊胞處尤逼真  
造物之巧有如此者自背上深入得一洞穴石色綠  
澗泉泠泠有聲自洞出垂蝦蟇口鼻間成水簾入江  
是日極寒岩嶺有積雪而洞中溫然如春碛洞相對  
稍西有一峰孤起侵雲名天柱峯自此山勢稍平然  
江岸皆大石堆積彌望正如濬渠土狀○晚次黃牛  
廟山復高峻村人來賣茶茶如柴枝草葉苦不可口  
廟靈感神封嘉應保安侯皆紹興以來制書也其卜  
即無義灘亂石塞中流望之可畏然舟過乃不甚覺

蓋操舟之妙也傳云神佐夏禹治水有功故食于此  
門左右立小石馬廟後叢木似冬青而非葉有黑文  
類符篆然葉各不同歐詩刻石廟中又有張文忠一  
贊其詞○壯哉黃牛有大神力輦聚巨石百千萬億  
劔戟齒牙礮碗江側壅激波濤險不可測威脇舟人  
駭怖失色刳羊醜酒千載廟食張意似謂神聚石壅  
流以脇人求祭饗蓋過論也夜舟人來告請無擊更  
鼓云廟後山中多虎聞鼓則出○十日早過鹿角虎  
頭史君諸灘水縮已三之二然湍險猶可畏泊城下  
歸州秭歸縣界也與兒曹步沙上回望正見黃牛峽

廟後山如屏風疊峩插天第四疊上有若牛狀其  
色赤黃前有一人如著帽立者昨日及今早雲冒山  
頂至是始見之因至白沙市慈濟院見主僧志堅問  
地名城下之由答云院後有楚故城今尚在因相與  
訪之城在一岡阜上甚小南壯有門前臨江水對黃  
牛峽城西北一山蜿蜒回抱山上有伍子胥廟大抵  
自荆以西子胥廟至多城下多巧石如靈壁湖口之  
類○十一日過達洞灘灘惡乃陸行過灘灘際多奇石  
五色粲然可愛亦或有文成物象及符書者猶見黃  
牛峽廟後山太白詩○三朝上黃牛三暮行太遲三

朝又三暮不覺鬢成絲。歐陽公○朝朝暮暮見黃牛。徒使行人過此愁。山高更遠望猶見。不是黃牛滯客舟。蓋諺謂朝見黃牛暮見黃牛。一朝一暮黃牛如故。故二公皆及之。歐陽公自荆渚赴夷陵而有下牢三游及蝦蟆碚黃牛廟詩者。蓋在官時來游也。○晚泊馬肝峽口。兩山對立。修聳摩天。畧如廬山。江岸多石。頗礙牽百丈。○十三日過東湍灘。入馬肝峽。石壁高絕。處有石下垂如肝。故以名峽。其旁有獅子岩。岩中有一小石蹲踞。張頤碧草被之。如青獅子。泉泠泠自岩中出。溪上又有一峯孤起。秀麗畧如小孤舟。○晚抵

新灘。十三日舟上新灘南岸。曰官漕。平北曰龍門。龍門水湍急多暗石。官漕差可行。故舟率由南上。然石多銳易穿船。故為峽中最峻處。必空舟乃利。往舟人利重載鮮不及也。游江濱北廟。廟正臨龍門下。溫泉出石隙。常不涸。一村賴之。婦人負木。盜汲。盜長二尺。三足以杓挹水。即倒坐旁石。束盜於背而去。大抵峽中多役婦。負物不獨水也。有婦負酒。沾如負水。狀呼買之。長跪以獻。未嫁者率戴高二尺同心髻。挿銀釵多至六。後挿牙梳。如手大。○十四日留驛中。晚渡江南。登山至江濱南廟。有碑。前進士曾華旦撰。言因山

崩石壅爲舟害於是著令自十月至二月禁行舟知  
歸州趙誠聞于朝禁行舟䟽鑿之而灘害始去皇祐  
三年也蓋江絕於天聖中至是而復通然灘害至今  
未悉去若乘冬春間水落石出時可併力盡鑿去銳  
石則灘害可除然灘上居民皆利於敗舟賤賣板木  
及滯留貨賣或賂石工以爲石不可去湏斷以必行  
乃可成又舟之所以敗皆失於重載當以大字刻石  
置驛前則過者必自懲創矣○十五日過白狗峽泊  
舟與山口肩輿游玉虛洞去江岸五里許隔一溪所  
謂香溪也源出昭君村水味色碧如黛已登載水晶

過溪又至魚洞門小纜家夫既入則可容數百人宏  
敞壯麗如入大宮殿中有石成幢蓋旛旗芝草竹筍  
仙人龍虎鳥獸之屬千狀萬態莫不逼真其絕異者  
東石正圓如日西石半規如月予平生所見岩竇無  
及者有熙寧中謝師厚岑岩起題名又有陳堯咨所  
作記叙此洞本末云獵者得之山中 ○十六日到  
歸州館於報恩光孝寺距城一里許歸之爲州纔三  
四百家負卧牛山臨江前即人鮓甕城中無尺寸土  
灘聲常如暴風雨至隔江有楚王城亦山谷間然地  
比歸州差平或云楚始封於此山海經夏啓封孟除

於丹陽城郭璞注云在秭歸縣南疑即此也然史記  
成王封熊繹於丹陽裴駘乃云在枝江縣未詳孰是  
十七日郡集於望洋堂玩芳亭亦皆沙石犖确之地  
十九日訪宋玉宅在秭歸縣之東今為酒家舊有石  
刻宋玉宅三字近以郡人避太守家諱去之可惜也  
○二十日早離歸州出巫峽門過天慶觀少留觀唐  
天寶元年碑載明皇夢老子事巴東太守劉瑄所立  
字畫頗清逸碑側題當時郡官吏胥姓名字亦佳又  
有周顯德中荆南判官孫光憲為知歸州高從讓所  
立碑從讓蓋南平王家子弟光憲亦知名國史有事

迹蓋五代時歸峽皆隸荆渚也殿前有栢數百年  
物觀下即吒灘亂石無數飯于靈泉寺遂登舟過  
業灘亦名灘也水落舟輕俄頃遂過○二十一日  
舟中望石門關僅通一入行天下至險也晚泊巴東  
縣江山雄麗大勝秭歸但井邑極蕭條邑中纔百餘  
戶自令解而下皆茅茨謁寇萊公祠堂發秋風亭臨  
江山遂登雙栢堂下舊有萊公所植栢今已槁死然  
南山重複秀麗可愛白雲亭則天下幽奇絕境群山  
環擁層出間見古木森然往往二三百年物欄外雙  
瀑瀉石澗中跳珠濺玉冷入肌骨其下是為慈溪奔

流與江會。予自吳入楚，行五千餘里，過十五州，亭榭之勝無如白雲者。而正在縣解廳事之後。○二十二日發巴東山，益竒怪。有夫子洞者，一竇在峭壁絕高處，人迹所不可至。然髮鬚若有攔楯，不知所謂。夫子者，何也？過三分泉，自山竇中出，止兩派。俗云三派有年，兩派中熟一派，或絕流饑饉，泊疲石。○二十三日過巫山，凝真觀，謁妙用真人祠。真人即世所謂巫山神女也。祠正對巫山峯巒，上入霄漢，山脚直插江中。議者謂太華、衡、廬皆無此竒，然十二峯者不可悉見。所見八九峯，惟神女峯最爲纖麗，竒峭宜爲仙真所

託。祝史云：每八月十五夜月明時，有絲竹之音，往來峰頂上。峰頂上猿皆鳴，達旦方漸止。廟後山半有石壇，平曠，傳云夏禹見神女授符書於此。壇上觀十二峰，宛如屏障。是日天宇晴霽，四顧無纖翳。惟神女峰上有白雲數片，如鸞鶴翔舞，徘徊久之不散，亦可異也。祠舊有烏數百，送迎客舟。自唐幽州刺史李貽詩已去，群烏幸昨餘矣。近乾道元年，忽不至今，絕無一鳥，不知其故。○泊清水洞，洞極深，後門自山後出，黠闇水流其中，鮮能入者。歲旱，祈雨頗應。○二十四日早抵巫山縣，在峽中亦壯縣也。市井勝歸峽二郡，隔江

南陵山極高大，有路如綫，盤屈至絕頂，謂之一百八盤。蓋施州正路，黃魯直詩：「一百八盤攜手至，今歸夢繞羊腸，即謂此也。」縣解有故鐵盆，底銳似半甕，狀極堅厚，銘在其中，蓋漢永平中物也。缺處鐵色光黑如佳漆，字畫淳質可愛，玩有石刻魯直作盆記大畧言：建中靖國元年，予弟叔向自涪陵尉攝縣事，予起戎州來寓縣，解此盆，舊以種蓮，余洗滌乃見字云。○游楚故離宮，俗謂之細腰宮，有一池，皆當時宮中燕游之地，今堙沒畧盡矣。三面皆荒山，南望江山奇麗，又有將軍墓，東晉人也，一碑在墓後，跌陷入地，碑

傾前欲壓，字纔半存。○下六百入瞿唐峽，兩壁對聳，上入霄漢，其平如削，成仰視天如疋練，然水已落峽中，平如油，益過聖姥泉，蓋石上一罅，人大呼於旁，則泉出，屢呼則屢出，可怪也。○晚至瞿唐關，唐故夔州與白帝城相連，杜詩：「白帝夔州各異城，蓋言難辯也。」關西門正對灩澦堆，堆碎石積成，出水數十丈，土人云：方夏秋水漲時，水又高於堆數十丈，入謁白帝廟，氣象甚古，松柏皆數百年物，有數碑，皆孟蜀時立。庭中石筍，有黃魯直建中靖國元年題字。○又有越公堂，隋楊素所創，少陵為賦，詩者已毀，近所築亦宏。



壯自關而東即東屯少陵故居也○二十七日早至夔州州在山麓沙上所謂魚腹永安宮也今為州倉而州治在宮西北甘夫人墓西南景德中轉運使丁謂薛顏所徙比白帝頗平曠然失關險無復形勢在瀼之西故一曰瀼西土人謂山間之流通江者曰瀼云州東南有八陣磧孔明之遺迹碎石行列如引繩每歲江漲磧上水數十丈比退陣石如故

吳船錄

宋 范成大

石湖居士以淳熙丁酉五月離成都泊舟合江亭下合江者乃岷江別派自永康離堆入成都及彭蜀諸

郡合于此下新津綠野平林烟水清遠極似江南亭之上曰芳華樓多梅蜀人入吳者皆從此登舟其西則萬里橋諸葛孔明送費禕使吳曰萬里之行始於此後因以名橋杜子美詩○門泊東吳萬里船此橋正為吳人設也○六月己巳朔發家屬舟下眉州彭山縣泊單騎轉城過東北門又轉而西自侍郎堤西行走岷山五十里至郫庚午至末康軍崇德廟在軍城西門外山上奉太守李冰父子廟食處也○辛未登城西樓其下後皆西戎山矣西門名玉壘關將至青城當再渡繩橋長百二十丈分為五架橋之廣十

一繩排連之上布竹笆攢立大木數十于江沙中輦石固其根每數十木作一架挂橋于半空大風過之掀舉幡幡然大畧如漁人曬網染家晾絲帛之狀又須捨輿疾步從容則振掉不可立同行者失色郡人云稍遷數里有白石渡可以船濟然極湍險也○晚至青城山曰寶仙九室洞天夜宿丈人觀觀丈人峯下五峰峻峙如屏觀之臺殿上至岩腹丈人自唐以來號五嶽丈人儲福定命真君傳記畧云姓審名封黃帝同時帝從問龍躡飛行之道本朝賜名會慶建福宮癸酉自丈人觀西登山五里至上清宮在最高

峰之頂以板閣插石作堂殿下視丈人峰直墻堵耳岷山數百峰悉在欄檻下如翠浪起伏勢皆東傾一軒對大面山一上六十里有夷坦處曰芙蓉坪道人于彼種芎非留旬日不可登且涉入夷界雖羽衣輩亦罕到者雪山在西域去此不知幾千里而瞭然見之則其峻極可知上清之游真天下偉觀哉夜有燈出四山以千百數謂之聖燈所至多有說者不能堅決或云古人所藏丹藥之光或謂草木之靈者亦有光或又以謂神靈山鬼所作其深信者以謂仙聖之所設化也甲戌下五里復至丈人觀二十里早頓長

生觀范長生得道處也○乙亥十五里發青城縣丙  
子二十里早頓周家莊十里至蜀州郡圍內西湖極  
廣袤荷花正盛呼湖船汎之繫纜修竹古木間景物  
甚野為西州勝處湖中多小菱菱至此始見之○丁  
丑三十里早頓江原縣四十里宿新津縣成都萬里  
橋之江與岷江合派下此巳卯以小舟至彭山午後  
至眉州城外江即玻璃江也冬時水色如此方夏潦  
怒濤漲皆黃流耳壬子發眉州六十里午後至中岩  
號西州林泉最佳處相傳為第五羅漢諾詎那道場  
又為老慈姥龍所居凡五里至慈姥岩前即寺也甲

申早出山至嘉定日未晡自眉至嘉百二十里中岩  
其半塗也壬寅發嘉州僅行二十里至王波渡宿蜀  
中稱尊者為波祖及外祖皆曰波又有所謂天波曰  
波月波雷波者皆尊之之稱此王波蓋王老或王翁  
也宋景文嘗辨之謂當作瞞字魯直貶涪州別駕自  
號涪瞞或從其俗云○癸卯發王波渡四十里至羅  
護鎮百里至犍為縣過縣二十里至下埧宿甲辰發  
下埧百里至叙州宣化縣百二十里至叙州纔亭午  
叙古戎州也山谷謫居在小寺中號大死菴後人遂  
作祠堂○乙巳發叙州十五里南廣江來合大江通

百二十里至南溪縣四十里至瀘州江安縣百二十里至瀘州方申時近城有渡瀘亭不知諸葛孔明的從何處渡或云叙州正對馬湖江馬湖夷入諸夷路當自彼渡也○戊申發瀘州百二十里至合江縣已酉發合江百四十里至恭州江津縣二十里過漁洞宿泥培村庚戌發泥培六十里至恭州自此入峽路大抵西川至東川風土已不同至峽益陋矣○辛亥發恭州嘉陵江江自利閬果合等州來合大江百四十里至涪州樂溫縣蒲氏墨舊出此縣大韶死久矣其族猶賣墨不復能大佳亦以價賤故也七十里至

涪州排亭之前波濤大洶湧如屋不可梢船過州入黔江泊此江自黔江來合大江怒濤水色黃濁黔江乃清冷如玻璃其下悉是石底自成都登舟至此始見清江涪雖不與蕃部雜居舊亦夷俗號為四人者謂華人巴人及稟君與盤瓠之種也○壬子發涪州百二十里至鄧都縣游仙都觀數十里至竹平宿癸丑發竹平七十里至忠州百十里至萬州宿甲寅發萬州六十里至開江口水自開建來合大江四十里至下岩四十里至雲安軍又十餘里泊舟宿乙卯行百四十里至夔州余前年入蜀以重午至夔魚腹方

漲八陣在水中。今來水更過之六十四。菴不復得見。頗有遺恨。○峽江水性大惡。飲輒生瘰。婦人尤多。前過此時。婢子輩汲江而飲。數日後發熱。一再宿。項頸腫起十餘人。悉然。至四川月餘。方漸消散。丙辰泊夔州。早遣視瞿塘水。僅能漫灩澦之頂。盤渦散出其上。謂之灩澦撒髮人。云如馬。尚不可下。況撒髮邪。是夜水忽驟漲。滄及排亭。及明走視灩澦。則已在五丈以下。或可以僥倖入峽。而夔人猶難之。丁巳水漲未已。遂決解維十五里。至瞿塘口。水平如席。獨灩澦之頂猶渦紋。灩澦舟拂其上。以過。槳櫓者皆汗。手死心面。

無人色。蓋天下至險之地。行路極危之時。旁觀者皆神驚。余已在舟中。一切付之自然。不暇問。據胡床坐。招頭處。任其盪兀。每一舟入峽。數里後。舟方續發。水勢怒急。恐猝相遇。不可解拆也。帥司遣卒執一旗。次第立山之上。下一舟平安。則簌旗以招。後船舊圖云。灩澦大如襍。瞿塘不可觸。灩澦大如馬。瞿塘不可下。此俗傳。灩澦大如象。瞿塘不可上。蓋非是也。後人立石辨之。甚詳。○峽中兩岸高岩峻壁。斧鑿之痕。皴皴然而黑。石灘最號險惡。兩山東江驟起。水勢不能平。余來此。水勢適平。俗所謂茶槽者。又水大漲。滄沒草。

木謂之青草齊則諸灘之上水寬少浪可以犯之余  
之來此水未能盡漫草木但名草根齊亦不可涉然  
犯難而行不可回首也十五里至大溪口水稍潤亦  
差遠夔峽之險也○七十里至夾山縣宿縣人云昨  
日水大漲灑灑恰在船底故可下夔峽巫峽則不能  
却須水退十丈乃可是夕水驟退數丈同行者皆有  
喜色戊午乘水退下巫峽灘龍稠險湍流洄洑其危  
又過夔峽○三十五里至神女廟廟前灘尤洶怒十  
二峯俱在北岸前後映帶不能足其數十二峰皆有  
名不甚切事不足錄所謂陽臺高唐觀人云在來鶴

峰上亦未必是神女之事據宋玉賦本以諷襄王後  
世不察一切以兒女褻之今廟中石刻引塘城記瑤  
姬封妙用真人廟額曰疑真觀廟有馴鴉客舟將來  
則迂數里外船過亦送數里土人謂之神鴉○二十  
里至東奔灘高浪大渦巨扁掀舞不當一葉或爲渦  
所使如磨之旋三老挽招竿叫呼力爭以出渦二十  
里過歸州巴東縣九十里至歸州未至州數里曰叱  
灘其險又過東奔連接新城下大灘曰人鮮甕巴未  
泊歸州八月戊辰朔發歸州五里至白狗灘三十里  
至新灘此灘惡名豪三峽八十里至黃牛峽上有洛

川廟黃牛之神也亦云助禹所疏川者廟在大峰峻壁之上有黃跡如牛一黑跡如人牽之云此其神也順流而下黃牛峽盡則扇子峽過此則峽中灘盡矣三十里得南岸平地曰平善埧出峽舟至是皆相慶如更生舟師篙工皆有犒賜已已發平善埧三十里至峽州

峽紀行

明 熊相

正德丙子秋九月予奉命之蜀道夷陵歸州巴東巫山以抵于夔歷驛棲鳳黃牛屈溪建平巴山萬流高唐逶迤四百餘里水急如射挽舟上者日不一舍

下者頃刻數程中間若十二背向陽背夜又背兩厓俱滑石而浪尤洶湧不可楫以綽匪篙即人背之故曰背也又曰與舟相背也有曰峽者狹也又曰山夾水曰峽蓋水行山間隨山以曲折在古統謂之西峽黃牛巫峽而已今則岐之爲荆棺石碑馬肝兵書門扇彈穿扁擔黑石風廂黃牽鐵鎖之類仰視之懸厓絕壁萬仞千尋如覆屋如峻削如斷截如連繹如半甕凹如駝峯凸如粲粲如色斯黝如土如練如草木葱蔥如鹿豕濯濯如猿猴之聲慘如藤蘿倒浸齧竇飛泉左環右抱如出無門間有鳥道綽者萬盤日午

方見而天之多斯昭昭然孰曰杜宇所鑿是皆成於  
混沌俯視之深潭莫極瀦潦流沙溶溶滾滾如釜之  
水如冶之金如珠之濺如花之蕊小而洄波大而盤  
渦如洞窈然如砥研然如風之旋油然隨闢隨闔舟  
遭之者鮮有出焉俗謂荆棺兵書風廂皆古人遺蹟  
予不敢信其他即物以狀因數以稱者固有謂也又  
有曰灘灘從水從難蓋水之難行者深淺不一轉徙  
無方岩岩恠石鋒利牙交平者鋪彈險者截江奇者  
可愛惡者可憎所謂鐵積劍排狼頭鹿角纍纍然牛  
馬飲於河者不足以模倣萬一水波摩激日夜不停

滾滾雷吼涓涓金鳴花噴若雪沙滾若奔瞻之近岸  
而多敗船曰喜曰登曰清曰葉曰偏滂猪圈馬鞍無  
義大小蛇葛棟通靈鋸齒石門牛口青溪蓮花三灘  
茲其大者也予過之舟行則畏途步無從乃嘆曰蜀  
道之難信矣若南沱過龍沱平善烏稍壩山斗坪柵  
水源流稍緩而可泊南津香溪口東西穰口勢空濶  
而可游碑石梢公石蝦蟆石灑瀨石大工之妙不假  
人爲十二峰孤峭拔空尤爲奇絕秭歸則屈原所生  
白帝則子美所戀魚腹沙孔明之圖攸在黃陵廟大  
禹之功未磨乃若高唐觀陽雲臺之雄據上流凡山



之蜿蜒峻嶒。杈枒峯嶺。幔張筓萬。蓋倚圭橫者。憑闌  
間。一目可盡。固楚襄之所流連。而宋玉之所賦者也。  
何景不可賞。何古不可吊。而以悶為哉。

三峽

盛弘之荊州記。三峽七百里。中兩岸連山。畧無闕處。  
重岩疊嶂。隱天蔽日。自非亭午。及夜分。不見日月。杜  
修可曰。峽程記云。三峽謂明月峽。巫山峽。廣澤峽。其  
瞿塘灩澦之類。不係三峽數。

紫府飛霞洞記

吾舊生越。舊間按越。舊為郡。居天下之西南角。得坤

之用在漢時。戶僅十四萬。其俗多營窟。版屋而息。如  
上古穴居。埜處之世。其地則多土。廣岩穴。接黎之邛  
苻。都雅之靈關。道自唐大斥土宇。包夷荒。而郡縣之  
民不堪命。越。舊遂與中華壤斷。土隔。真人幸啓。偃兵  
息民。執玉斧而劃棄大渡之外。越。舊遂淪。嗚呼。吾將  
安歸。當以黎雅為鄉也。黎之邛峽。關有靈應洞。乃吾  
之變化所。惟古蒙。舊屬漢嘉之青衣。其俗醇厚。簡古  
如周民。好善。堯民可封。其地襟帶岩巒。如大華之磅  
礴。岷峨之嶙峋。吾常愛而居焉。近奉帝命。往來全蜀。  
至則寓之。以行化。恨榛莽掩翳。如小有清虛之所。吾

必久留邑下苟洙父子念此其久吾知而直命之乃  
忻然於吾殿後斬荆棘去茅菅為一洞天費僅二十  
萬錢屋穴皆備吾揭為紫府飛霞蓋本班固賦西都  
據坤靈之正位做大紫之圓方與王勃記滕王閣彩  
徹雲衢霞鶩齊飛之義上以示吾不忘故鄉之意下  
以期有志於攀鱗者休哉蒙山之下亦有變化之所  
矣後之人有能自勵而期為汗漫游者乎然東山舊  
祠興自紹興丙寅逮今年丁卯始克有洞穴而洞穴  
不成於他人而成於苟洙父子亦有數也一日苟洙  
欲紀年月日此事非神其誰宜為吾亦為忻然親書

于石開禧三年六月十八日

西山南浦行記

宋 黃庭堅

余蒙恩東歸道出南浦太守高仲本置酒西山實與  
其從事譚處道俱來西山者蓋郡西渡大壑稍陟山  
半竹栢蒼蔚之間水泉瀦為太湖亭樹環之有僧舍  
五區其都名名曰勒封院樓殿臺觀重復出沒烟霏  
之間而光影在水此邦之人歲修禊事於此凡夔州  
一道東望巫峽西望郁駝林泉之勝莫與南浦爭長  
者也寺僧文照喜事作東西二堂於茂林修竹之間  
仲本以為不奢不陋冬燠而夏涼宜於游觀也

游安樂山記

宋 黃庭堅

建中靖國元年正月晦合江令尹白宗愈率江西黃魯直拏舟泛安樂溪上劉真人山同來者臨穎索繼萬黔安文輝主簿郭中以疾初起不能來尉周世範以支軍廩不至安樂山真人飛昇之宅也真人諱珎字善慶初卜居此山曰雙道平山氣雙而不清江安方山氣濁而不秀求山而清秀唯安樂山耳既定居泉源發甘虎豹服役晦日之游雲霧晦暝將出山晚晴諸峰皆出

黔南道中行記

宋 黃庭堅

紹聖二年三月辛亥次下牢關同伯氏元明巫山尉辛紘傍厓尋三游洞繞山行竹間二百許步得僧舍號大悲院才有小屋五六間僧貧甚不能為客煎茶過大悲遵微行高下二里許至三游間一徑棧閣繞山腹下視深谿悚又一徑穿山腹黥闇出洞乃明洞中畧可容百人有石乳爰乃一滴中有空處深二丈餘可立嘗有道人宴居不耐爰而去壬子堯夫舟先發不相待日中乃至蝦蟆碛從舟中望之頤頷口吻甚類蝦蟆也予從元明尋泉源入洞中石氣清寒流泉激激泉中出石腰骨若虬龍糾結之狀洞中有崩

石平濶可容數人宴坐也水流循蝦蟆背垂鼻口間  
乃入江耳泉味亦不極甘但冷熨人齒亦其源深來  
遠故耶○壬子之夕宿黃牛峽明日癸丑舟人以豚  
酒享黃牛神兩舟人飲福皆醉長年三老請少駐乃  
得同元明堯夫曳杖清樾間觀歐陽文忠公詩及蘇  
子瞻記丁元珍夢中事觀隻耳石馬道出神祠背得  
石泉甚壯急命僕夫運石去沙泉且清而冽陸羽茶  
經紀黃牛峽茶可飲因令舟人求之有媪賣新茶一  
籠與草葉無異山中無好事者故耳○癸丑夕宿鹿  
角灘下亂石如困廩無復寸土步亂石間見堯夫坐

石據琴兒大方侍側蕭然在事物之外元明呼酒酌  
堯夫隨磐石爲几案牀座夜闌乃見北斗在天中堯  
夫爲履霜烈女之曲已而風激濤波灘聲洶洶大方  
抱琴而歸初余在峽州問士大夫夷陵茶皆云掬澁  
不可飲試問小吏云唯僧茶味善試令求之得十餅  
價甚平也携至黃牛峽置風爐清樾間身候湯手搯  
得味既以享黃牛神且酌元明堯夫云不減江南茶  
味也乃知夷陵士大夫但以貌取之耳可因人告傳  
子正也

峻巖上時隱

見夫不與衆山相連屬是之謂

堆東回

堂有室

...

...

...

...

...

...

